

有一種愛，叫第三者

作者: Up Sign

Powered by [紙言](#)

1. 壞人沒有一個是無辜的

「Good afternoon Sir ! PC2112報到！我叫何家寶！寶貝個寶！」

我竭力壓制震抖嘅雙腳，喺Briefing房向大Sir同各位師兄師姐報到。

大學畢業後，我去了一間小學教書。

我覺得，世界非黑即白，對錯分野明顯；喺我心目中，從來只會「有強姦無侷賭」，永遠無「我都唔想，我無得揀」呢八個字，所以我唔相信做錯事既人會「唔想」同「無得揀」。

可能呢個信念，驅使我棄文從武，投考警察；我要證明壞人沒有一個是無辜的。

2. 螢火蟲

公務員呢個職系好特別，特別鐘意小事化大；可能太無聊太刻板，少少變動，就好似書枱多左嚟擦膠、水機少左紙杯，都足以夠佢哋討論一日

所以，而家多左位新入職嘅同事，仲要係女同事，仲要係一位前小學女教師，喺呢個男多女少環境入面，我就好似漆黑中嘅螢火蟲一樣，咁鮮明，咁出眾。

3. 小兔兔

初來報到，我好快有個新朵：小兔兔。

點解嘅？因為純情小兔兔囉！

的確，我係比較斯文，但絕對說不上純情，至少以前從無人咁形容過我。可能係我工作背景，令同事有呢種錯覺，又或者，我係單純到連自己有幾咁單純都唔知。

有位師兄同我講，教師同警察嘅分別，只係一堆披著羊皮嘅狼，同披著狼皮嘅狼。我心諗，呢位師兄想法未免過於悲觀。我總抱著一個信念：人，總會有好人；而且人不犯我，我不犯人。

更何況，大家都對我好好，特別關照我。我就好似身份證，佢哋去到邊都會帶著。係我心目中，佢哋嘴賤但心甜，高傲但宅心仁厚。

我好快就融入呢到，而且工作愉快，因為有一班呵住小兔兔嘅同事。